



(khas bagi Majalah Qalam - tidak dibenarkan dikutip)

### “Family Planning dan Birth Control”

Ahmad Muhammad Qasim, Pasir Panjang Singapura bertanya: Baharu-baharu ini telah timbul “fatwa” daripada Chif Kadi Singapura yang berasal tentang menjarakkan beranak- yang dijawab beliau dengan masalah menggugurkan kandungan di dalam perut yang belum sampai empat bulan- sesudah fatwa itu keluar terbit pula bantahan-bantahan daripada ulama-ulama Islam. Kerana saya orang awam tidak mengetahui manakah alasan yang benar maka sukacita saya kiranya dapat tuan memberi kenyataan tentang bagaimanakah Islam menentukan atau hendak menghukumkan sesuatu supaya menepati kejadian-kejadian itu dengan hukum-hukum yang telah ditetapkan oleh Islam.

Jawab: Sebenarnya kerap kali berlaku perselisihan pendapat tentang menentukan sesuatu hukum itu oleh ulama-ulama kita bukannya disebabkan oleh hukum-hukum itu tidak ada tetapi lazimnya kerana kurang penyelidikan tentang sesuatu masalah yang hendak diberi hukum di atasnya.

Menurut kaedah syarak bahawa apabila hendak menentukan sesuatu hukum itu hendaklah perkara yang hendak dihukumkan itu dibentangkan dahulu hal-halnya dengan terang dan sesudah terbentang di hadapan kita baharulah ia meletakkan hukum agama ke atasnya samada perkara itu menepati hukum al-Quran, al-Hadis, ijmak sahabat ataupun pada perkara yang boleh dikiaskan kepada asas-asas hukum yang tersebut.

Dengan berasas kepada yang demikian inilah maka sepatutnya

Peringatan: Pertanyaan-pertanyaan yang tidak disertakan tanda tangan dan alamatnya yang terang tidak diraikan. Juga pertanyaan-pertanyaan yang mengenai di sekeliling hal ehwal masyarakat kita itulah yang diutamakan daripada soal yang sulit-sulit dan jarang berlaku oleh kerana ruangan ini adalah berguna juga untuk panduan pembaca-pembaca.

sebelum sesuatu perkara hendak dihukumkan atau hendak ditentukan hukumnya itu terlebih dahulu diminta keterangan ahli-ahlinya kerana ulama fekah, hadis dan taksir itu ada kalanya tidak mengetahui selok belok perkara-perkara kesihatan sedang perkara-perkara yang mengenai kesihatan itu tidak pula satu jenis ahli-ahli ilmu padanya- dan dengan sendiri yang demikian itu terkait kepada firman Allah (yang maksudnya): Tanyalah (akan sesuatu) kepada ahlinya (*ahl al-dhikr*) dalam perkara-perkara yang kamu tidak ketahui.

Di sinilah kerap kali yang menjadi punca kepada beberapa kesalahan untuk menentukan sesuatu hukum kerana terkadang-kadang keadaannya satu tetapi keadaan itu pula berbeza-beza sebabnya yang menjadikan berbeza-beza pula hukum di atasnya. Sebab itulah telah menjadi suatu kebijaksanaan kepada ulama atau majlis ulama atau majlis syura untuk mengadakan suatu kerjasama atas sesuatu masalah di antara alim ulama tentang hukum-hukum yang mengenai agama dengan ahli-ahli cerdik pandai seperti ahli-ahli perubatan, ahli-ahli iktisad dan ahli-ahli hukum untuk orang-orang yang membuat masalah kemudian masalah-masalah yang didatangkan oleh ahli-ahli pengetahuan itu dibahas oleh ulama-ulama Islam daripada ahli-ahli yang mahir dalam tafsir dalam al-Hadis dan dalam fekah.

Terlanjur telah membicarakan perkara sekatan beranak yang jadi perbahasan itu ada moleknnya rasanya di sini kita memberi penerangan kepada cara mana hendak menentukan hukum-hukum di atasnya.

sambungannya pada muka 36

(sambungan dari muka 5)

Sepatutnya sebagaimana yang tersebut di atas, orang yang hendak memberi fatwa itu terlebih dahulu mengetahui dengan sedalam-dalamnya tentang apa sebenarnya yang dimaksud tentang “*Family Planning*” (mengatur keluarga) yang dianjurkan dan apa pula yang dikehendaki dengan “*Birth Control*” (mengawal beranak).

Daripada apa yang telah kami siasat maka ada bezanya di antara keduanya. Baik di dalam caranya atau pun tujuannya. Tujuan yang diberi oleh *family planning* itu, daripada apa yang telah dimaklumkan, ialah untuk menjarakkan beranak, supaya kesihatan ibu dapat terjamin dan supaya dapat ia menyelenggarakan anak dengan sempurna dengan tidak pula merosakkan tempat beranak - yakni mengadakan ikhtiar-ikhtiar sebelum benih kejadian itu tumbuh di dalam rahim perempuan.

Kaedah-kaedah yang diberi tidaklah sama sekali merosakkan rahim perempuan ataupun tempat peranakan perempuan itu. Umpamanya menggunakan getah, atau pun menggunakan sesuatu ubat yang dimasukkan beberapa minit ke dalam rahim perempuan untuk membunuh hama-hama yang keluar selama sejam sahaja.

Di dalam negeri-negeri seperti Singapura ini ada pertubuhan yang menganjurkan *family planning* ini dengan menunjukkan kaedahnya serta bagaimana menggunakan getah ke dalam rahim perempuan yang kerananya diadakan doktor perempuan untuk mengajar ianya menggunakan getah serta menyatakan besar kecil getah yang hendak digunakan. Langkah-langkah yang dijalankan ini menurut keyataan yang diberi ini tidak sekali-kali merosakkan kepada kesihatan perempuan itu dan perempuan itu apabila suka dengan sendirinya boleh membuka atau mengeluarkan getah itu daripada rahimnya.

Di dalam cara-cara yang diberi dalam hal ini terang dan nyata ditujukan semata-mata untuk menjauhkan percampuran antara mani lelaki dengan perempuan yang boleh menjarakkan anak dengan tidak sekali-kali merosakkan

tempat beranak dan tidak pula merosakkan kesihatan lelaki.

Dengan tujuan ini maka timbul satu soal bagaimanakah perkaitannya jika suami pula menggunakan “*French Kiff*” yakni sarung getah bagi lelaki? Bolehkah yang demikian ini dikaitkan dengan hukum yang mengenai ‘azal? (‘azal ialah lelaki dengan keredaan perempuan apabila tiba saat inzal mengeluarkannya di luar daripada rahim perempuan).

Soal menjarakkan anak dengan menggunakan cara “berazal” ini diterangkan oleh hadis-hadis dan athar seperti yang disebutkan di bawah ini, maksudnya:

Daripada Jābar, katanya: “Kami biasa menggunakan cara berazal pada zaman Rasulullah (SAW), sedang al-Quran ketika itu masih turun.” (*Mitfaq ‘alayh*) dan bunyinya menurut riwayat Muslim pula: “Kami biasa menggunakan cara berazal pada zaman Rasulullah (SAW). Perkara itu telah sampai ke pengetahuannya dan ia tidak melarang kami.”

Daripada Abu Sa‘īd, berkata: “Orang-orang Yahudi berkata, berazal itu ialah membunuh anak dengan cara halus, mendengarkan itu Rasulullah (SAW) bersabda: Berdustalah kaum Yahudi. Sesungguhnya Allah ‘Azza wa Jalla jika berkehendak menjadikan sesuatu, tidak akan sanggup sesiapa menahannya”.

-R.Ahmad dan Abū Dāwūd.

Dari Usāmah bin Ziyad, “Bahawa seorang lelaki telah datang mengadap Rasulullah (SAW) dan berkata: “Saya menggunakan cara berazal dalam masa bersatu dengan isteri saya” “Apa sebab kamu lakukan yang demikian?” Tanya Nabi kepadanya. Orang itu menjawab: “Saya kasihankan anak-anaknya.” Rasulullah (SAW) bersabda: “Kalau perbuatan (berazal) itu berbahaya tentulah telah membahayakan orang-orang Parsi dan Rom (yang biasa menggunakannya).

-R.Ahmad dan Muslim.

Dalam pada itu ada suatu hadis yang melarang daripada berazal:

Daripada Jadhāmat binti Wahab al-Asdinat katanya: “Saya telah menghadiri majlis Rasulullah (SAW) ketika ia sedang berkata kepada beberapa orang: Aku telah tergerak hendak melarang daripada perbuatan “*ghaylah*” tetapi aku siasat dari hal orang Rom dan Parsi lalu ku dapati mereka menjalankan cara “berghaylah” itu dan perbuatan itu tidak membahayakan anak-anak mereka orang yang hadir pun bertanyakan Nabi tentang hukum berazal lalu Baginda bersabda: “Itulah dia perbuatan “*al-wa’ad al-khafi*” (membunuh anak dengan cara sembunyi), lalu dijelaskan dengan membaca satu ayat Quran: *Wādh al-mu’adat si’lat* (ketika anak perempuan yang dibunuh dengan ditanam hidup-hidup itu akan diperiksa sebab-sebabnya maka ia dibunuh).

-R.Ahmad dan Muslim

Kalimah “*ghaylah*” yang tersebut di atas ialah maknanya bercampur dengan isteri dalam peringkat masa si isteri menyusukan anak dari susunya sendiri. Perhatikan Rom dan Parsi yang biasa melakukan perbuatan itu tidak membahayakan anak-anak mereka maka Rasulullah tidak melarang umatnya daripada melakukannya.

Jelasnya hadis Ummu Jadhāmat yang tersebut melarang daripada perbuatan berazal dan bertentangan dengan tiga hadis yang telah diturunkan di atas yang membolehkan berazal dan kerana itu timbul *ikhtilaf* ulama sepuak mengatakan boleh berazal dan sepuak mengatakan tidak boleh.

Dalam pada itu ada pula ulama yang telah menyatukan hadis yang melarang ini dengan hadis-hadis yang membolehkan, (yakni menyesuaikan kehendak sekira-kira tidak bertentangan) di antaranya ialah al-<sup>o</sup>Allāmah Ibnu al-Qayyim.

Ibnu al-Qayyim berkata: Rasulullah (SAW) telah mendustakan kaum Yahudi. (Dalam hadis yang membolehkan berazal) dan telah menerangkan bahawa berazal itu tidak mencegah daripada hamil apabila Tuhan ‘Azza wa Jalla hendak menjadikan anak itu maka dijadikannya (dengan tidak ada apa-apa yang

boleh menghalangnya) dan jika tidak dikehendaknya maka tidak akan terjadi makhluk itu. Demikian pula perbuatan berazal itu bukanlah perbuatan *wa’ad* (membunuh anak) yang hakiki dan kerana itu ia disifatkannya dengan “*wa’ad khuff*” (membunuh anak dengan jalan sembunyi) dalam hadis Jadhāmat (yakni hadis yang melarang daripada berazal), kerana seseorang suami menggunakan cara berazal itu ialah kerana hendak mengelak supaya isterinya jangan hamil dan kerana itu *qisadnya* yang tersebut telah disifatkan seperti *qisad* membunuh anak tetapi perbezaan keduanya ialah bahawa perbuatan “*al-wa’ad*” membunuh anak dengan menanam hidup-hidup) itu dapat dilihat nyata dengan dikerjakan dia maka dengan itu terhimpun kepadanya *qisad* dan perbuatan, sedang “berazal” itu pula adalah bergantung kepada *qisad* sahaja. dan kerana itu disifatkan dengan “*wa’ad*” yang tersembunyi.

Selain daripada itu hadis yang melarang berazal telah dilemahkan kerana ada tambahan di hujungnya yang hanya Sa‘d bin Abī Ayyūb seorang sahaya yang meriwayatkan daripada al-Aswad dengan ibarat yang tersebut, pada hal Mālik dan Yahyā bi Ayyūb yang juga telah meriwayatkannya daripada al-Aswad tidak menyebut tambahan itu kerana ibarat itu menentang maksud hadis-hadis yang membolehkan berazal. Penyusun-penyusun kitab-kitab hadis “*al-Sanan al-Arba’*” telah membuang tambahan tersebut.

Dengan huraian ini nyatalah berazal yang dilakukan dengan *qisad* hendak menjarangkan anak kerana menjaga kesihatan ibu supaya jangan bertambah teruk, boleh dan tidak dilarang oleh Islam.

Melihat kepada keterangan itu maka pada pandangan kita bolehkah yang demikian itu dikiaskan kepada izal yakni lelaki diluluskan menggunakan sarung getah dengan syarat hendaklah ada persetujuan di antara kedua-dua pihak (suami isteri).

Ada lagi suatu cara biasa yang dilakukan orang-  
Ini pun tidak berapa terjamin iaitu janganlah hendaknya

ada persetubuhan di antara keduanya seminggu atau sepuluh hari sesudah kering haid bagi wanita. Cara ini banyak juga digunakan, dan menurut sebahagian pihak adalah memberi kesan.

Yang tersebut di atas ialah perkara yang mengenai peraturan berkeluarga (*family planning*) yang keadaannya berlainan pula dengan *birth control* (mengawal) beranak. Kita belum menyiasat dengan secukup-cukupnya tentang perkara yang kedua ini (mengawal beranak). Kita hanya mendapat sedikit gambaran yang menunjukkan bahawa di antara cara-cara yang dijalankan ialah memotong suatu urat di pinggang wanita dan dengan potongan itu maka dengan sendirinya putuslah sama sekali harapan bagi wanita itu untuk mendapat anak. Perbuatan yang semacam ini, merosakkan tempat peranakan, sekalipun disetujui oleh suami, adalah dilarang oleh Islam kerana yang demikian bermakna merosakkan tempat beranak. (Pihak kita sekarang menyiasat cara-cara yang demikian ini).

Sekarang telah zahir di hadapan kita dua cara-cara menyusun keluarga (*family planning*) dan cara menyiasat beranak (*birth control*). Di dalam dua cara ini sedikit sebanyak telah digambarkan. Di sini kita patut pula mengkaji apakah niat atau tujuannya?

Tiap-tiap sesuatu perbuatan atau amal itu hendaklah dengan niat. "Tiap-tiap amal adalah dengan niat"-maksud hadis Rasulullah (SAW).

Apakah niat atau tujuan langkah-langkah yang dikehendaki menyekat beranak itu? Inilah puncanya. Adakah niat itu kerana takut tidak terberi makan; atau kerana tidak terberi pelajaran; dan atau kerana ibu itu tidak cukup sihat (kerana kesihatan ibu). Sekiranya kerana tidak cukup makan atau tidak terberi pelajaran- yang demikian ini adalah sebab-sebab yang tidak dikuasai oleh manusia -yang demikian ini adalah di dalam tangan kekuasaan Tuhan -sebab-sebab yang semacam ini adalah ditegah atau tidak diluluskan dengan beralasan kepada beberapa ayat al-Quran.



*al-Ustādh Abbās Mahmūd al-'Iqād pujangga Arab yang terkenal.*

\* \* \*

Tetapi berkenaan dengan kesihatan diri ibu maka di sini kebanyakan ulama-ulama meluluskannya. Umpamanya seseorang ibu yang beranak tiap-tiap tahun- keadaannya semakin banyak anak semakin lemah dan tiap-tiap kali beranak keadaannya terdedah dalam bahaya- umpamanya terpaksa anaknya dikeluarkan dengan paksa oleh doktor dan seumpamanya- adalah yang demikian diluluskan kerana Islam tidak sekali-kali menyuruh seseorang itu memasuki dirinya di dalam bahaya.

Jadi terang bahawa satu keadaan tetapi keadaannya berlainan maka tidak boleh terus dihukumkannya sama sahaja dengan suatu hukuman.

Adakah perkara ini boleh dikaitkan dengan menggugurkan beranak? Hal ini Inshā Allāh akan kita beri penjelasan dalam keluaran yang akan datang.